

Señor Tromp di Bubali ta contento cu su Anasa



ORANJESTAD (AAN): A keda demostra cu bo por cultiva Anasa na un forma facil, y casi tur caminda di mundo.

Esey ta debi cu e mata di Anasa ta uno di e poco fruta tropical cu por worde creci den potchi, y esey nifica cu bo por laga e mata crece paden di bo cas tambe.

Pero hopi ta prefera di haci esey den nan hardin, y si bo planta nan den e bon lugar, kizas bo no mester ni cuide tampoco.

Aki DIARIO ta mustra potret di Anasa (pineapple, piña) cu a worde cosecha aki na Aruba,

na cunucu di Sr. Tromp na Bubali.

Claro, e ta un ehempel pa mas Arubiano purba di cosecha tambe.

Hopi hende gusta e fruta aki, y tin algun cu ta encanta cu su flor. Y unavez bo haya algun anasa, bo sa cu nan ta multiplica rapido. Pues tin chens cu despues di tempo bo tin masha hopi mata di Anasa na bo cas.

E mata di Anasa no mester di hopi awa. Nan tin algun blachi cu ta fuerte, pues nan no ta perde hopi awa door di evaporacion. Nan por biba cu djis poco awa.

Anasa tampoco no mester di hopi bon gordura. Nan ta pertenece na e famia di bromeliads, pues nan no tin un sistema grandi di raiz.

Anasa ta haya hopi di nan awa y nutricion via di nan blachinan. Nan ta crece den solo, hasta den e climanan di mas calor, pero nan ta avanza bon tambe si nan ta worde planta den sombra.

Loke e mata di Anasa NO gusta ta tera cu cada rato ta papa muha, of si bo kima nan blachinan cu fertilizantenan concentra.

